

दिनांक 25.06.2025
 समय: 18.45 बजे
 आकाशवाणी जयपुर-अजमेर
 प्रादेशिक समाचार

- भारत रा शुभांशु शुक्ला अर दूजा देशां रा तीन यात्रियां सागे एक्सओम-4 मिशन अंतरिक्ष ओड़ी रवाना क्यो-पूरो देश ई उपलब्धि ऊं उमाव महसूस कर रह्यो है।
- प्रधानमंत्री नरेन्द्र मोदी संविधान हत्या दिवस रे मौके लोकतंत्र री हिफजत करण वाळां ने सिरधाभाव सागे याद कीना-आपातकाल विरोधी दिवस रे मौके प्रदेशभर मांय केई कार्यक्रम।
- मुख्यमंत्री भजन लाल शर्मा पंजाब रा मुख्यमंत्री भगवंत मान सागे फोन रे जरिये फिरोजपुर फीडर पुर्ननिर्माण परियोजना रा काम रा बारा मांय चर्चा कीनी।
- प्रदेश मांय अन्त्योदय संबल पखवाड़ा रा तैत ग्राम पंचायतां मांय शिविर लगा र पात्र लोगां ने फायदो दियो जा रह्यो है।

भारत रा अंतरिक्ष यात्री शुभांशु शुक्ला तीन और अंतरिक्ष यात्रियां सागे अन्तर्राष्ट्रीय अंतरिक्ष स्टेशन सारु उड़ान भर र इतिहास रच दीनो है। भारत री वायु सेना रा ग्रुप कैप्टन शुक्ला अंतरिक्ष ऊं संदेश भेज्या संदेश मांय कह्यो के ओ एक अद्भुत सफर है अर भारत 41 साल पछे ओजू अंतरिक्ष मांय पूग्यो है। ग्रुप कैप्टन शुक्ला कह्यो के आ यात्रा भारत रा मानव अंतरिक्ष कार्यक्रम री सुरुआत है।

एक्सओम-4 मिशन ने अमेरिका मांय फ्लोरिडा रा जोन एफ केनेडी केन्द्र ऊं छोडी ज्यो। 28 घंटा रा सफर पाछे भारत रा समय रे मुजब काल सिंज्यां साढ़े चार बज्यां ओ अन्तर्राष्ट्रीय अंतरिक्ष स्टेशन ऊं जुड़ेला। राष्ट्रपति द्रौपदी मुर्मू ई माथे खुषी जताता थकां कह्यो के शुभांशु शुक्ला अंतरिक्ष मांय भारत सारु नुवो मील रो पत्थर लगायो है। प्रधानमंत्री नरेन्द्र मोदी भारत, हंगरी, पौलेण्ड अर अमेरिका रा अंतरिक्ष यात्रियां ने ले र ग्या ई मिशन रो स्वागत कीनो है। एक्सओम-4 मिशन निजी अंतरिक्ष यात्रा रा हलका मांय नुवो कदम है। ओ मिशन नासा, एक्सओम स्पेस अर स्पेस-एक्स मिल र चलायो है।

आज संविधान हत्या दिवस मनायो जा रह्यो है। देश मांय साल 1975 मांय लगायी ज्या आपातकाल रा 50 साल पूरा व्हेवण रे मौके प्रधानमंत्री नरेन्द्र मोदी लोकतंत्र बचावण वाळां ने सिरधाभाव सागे याद कीना। संवैधानिक मूल्यां माथे करी ज्या हमला ने याद करता थकां प्रधानमंत्री कह्यो के आपातकाल लागू कर र जनता रा मौलिक अधिकारां ने निलम्बित करी ज्या, प्रेस री आज़ादी खत्म करी ज्यी अर लाखां लोगां ने कैदखाना मांय डाल दिया ज्या हा जिण ने देश रो कोई ई रेहवासी नी भूल सकेला। प्रधानमंत्री संवैधानिक सिद्धान्तां ने मज़बूत बणावण अर विकसित भारत री सोच ने सांची करण सारु मिल र काम करण रो संकल्प दोहरायो।

संविधान हत्या दिवस रे मौके मुख्यमंत्री भजन लाल शर्मा जयपुर मांय राखी ज्या लोकतंत्र सेनानियां रा मान जळसा अर संगोष्ठी कार्यक्रम मांय पिरकत कीनी। ई मौके वे कह्यो के लोकतांत्रिक मूल्यां री हिफाजत करणो म्हां सगळां री ज़िम्मेदारी है।

संविधान हत्या दिवस रे मौके आखा राज्य मांय प्रदर्शनियां, संगोष्ठियां अर दूजा कार्यक्रम राख्या जा रह्या है। बांसवाड़ा अर सवाईमाधोपुर समेत न्यारी-न्यारी ठाँडां लोकतंत्र सेनानियां ने सिरधाभाव सागे याद कर्या जा रह्या है। ध्यानजोग है के आपातकाल रे दौरान विपक्ष रा जयप्रकाश नारायण, मोरारजी देसाई, अटल बिहारी वाजपेयी, लालकृष्ण आडवाणी समेत कई नेतावां ने **आंतरिक सुरक्षा अधिनियम मीसा** रा तैत गिरफ्तार करी ज्या हा अर करीब पैंतीस हजार लोगां ने बिना सुणवाई रे हिरासत मांय ले लिया ज्या हा।

केन्द्रीय कैबिनेट री आज व्ही मीटिंग मांय देश मांय आपातकाल लगावण रा 50 साल पूरा व्हेवण रे मौके प्रस्ताव पास करी ज्यो। प्रधानमंत्री नरेन्द्र मोदी री सदरत मांय व्ही मीटिंग मांय इण ने भारत री लोकतांत्रिक भावना माथे हमलो बतायी ज्यो। केन्द्रीय मंत्री अखिनी वैष्णव खबरनवीसां ने आ जाणकारी दीनी।

मीटिंग मांय तीन खास फैसलां ने मंजूरी दीरीजी। उत्तर प्रदेश रा आगरा मांय अन्तर्राष्ट्रीय आलू केन्द्र बणावण अर महाराष्ट्र रा पुणे मांय मेट्रो विस्तार ने मंजूरी दीरीजी। ई रे अलावा अंतरिक्ष मिशन ने कामयाबी सागे छोडण रो स्वागत करता थकां प्रस्ताव पास करी ज्यो।

मुख्यमंत्री भजन लाल शर्मा पंजाब रा मुख्यमंत्री भगवन्त मान सागे आज फोन रे जरिए बात कर र फिरोजपुर फीडर ने और बेहतर बणावण री परियोजना रा काम री प्रगति रा बारा मांय चर्चा कीनी। बातचीत ने ध्यान राखता थकां फिरोजपुर फीडर ओजू बणावण रो काम बेगो ई सरू व्हेवण रा आसार है। ओ फीडर गंगनहर हलका रा काफ़्तकारां सारू घणो खास है। **राजस्थान और पंजाब की संयुक्त भागीदारी से इस परियोजना पर 647 करोड़ 62 लाख रुपये खर्च किये जायेंगे।** श्री शर्मा कह्यो के केन्द्र सरकार ऊं माली मंजूरी मिल्यां पाछे पंजाब सरकार सागे तालमेल ऊं ओ काम बेगो ई सरू कर्यो जावेला। वे कह्यो के ई काम ऊं फीडर रो बूतो मौजूदा 11 हजार 192 क्यूसेक ऊं बध र 13 हजार 842 क्यूसेक व्हे जावेला। ई सागे ई ई परियोजना ऊं गंगनहर रा तीन लाख 14 हजार हैक्टेयर हलका ने पाणत सारू जरूरी पाणी मिल सकेला।

प्रदेश मांय काल सरू करी ज्या अन्त्योदय सम्बल पखवाड़ा रा तैत आज ग्राम पंचायता मांय खास षिविर लगायी ज्या। आं रे मार्फत पात्र लोगां ने जनता रा भला री न्यारी-न्यारी योजनवां रो सीधो फायदो दियो जा रह्यो है। बालोतरा ज़िला री 17 ग्राम पंचायतां मांय लगायी ज्या षिविर मांय मोटी तादाद मांय लोग नाम मण्डाया। श्रीगंगानगर मांय चुणी ज्यी ग्राम पंचायतां मांय लगायी ज्या षिविरां ऊं मोती तादाद मांय लोगां ने फायदो मिल्यो। ज़िला मांय सरकारी योजनावां रो फायदो लेवण वाळो एक जणो बतायो के षिविर रे मार्फत वां रा हलका मांय 35 साल ऊं बंद गेलो खोलण माथे एक राय बणी है।

राज्य रा पर्यटन विषेण अर रिटायर्ड आई.ए.एस. अहलकार ललित के. पंवार ने नीति आयोग रा विषेण सलाहकार बणायी ज्या है। श्री पंवार देष मांय पर्यटन अर ट्यूर ऑपरेटर हलका ऊं जुडी राय देवेला। वे केन्द्र सरकार मांय पर्यटन सचिव अर आईटीडीसी रा सीएमडी रा तौर ऊं सेवा दे चुक्या है।

राज्य रा केई हलकां मांय बादळां री गाज़ सागे चोखी बिरखा व्हे रही है। आज चूरु, बांसवाड़ा, सवाईमाधोपुर, भरतपुर, कोटपूतली-बहरोड़, भीलवाड़ा अर हनुमानगढ़ मांय चोखो मेह बरस्यो। कठे-कठे भारी ऊं घणी भारी बारिष रा समाचार है। लारला चौबीस घंटां मांय सब ऊं बत्ती 19 सेंटीमीटर बिरखा बांसवाड़ा ज़िला रा सल्लोपाट मांय व्ही। डूंगरपुर ज़िला रा सागवाड़ा मांय 14 सेंटीमीटर पाणी बरस्यो। म्हाणा खबरनवीस बतायो के ज़िला रा आसपुर, देवल, चिखली अर गलियाकोट समेत केई ठौड़ां झमाझम बरसात व्ही।

राजसमंद अर पाली ज़िला रा देसूरी मांय 11-11, भीलवाड़ा ज़िला रा माण्डल सहित आसपुर, सांगोद, अटरू अर मांगरोल मांय 10-10 सेंटीमीटर बरसात व्ही। बारां ज़िला मांय लगातार लगातार व्हे रही ज़ोरदार बारिष ने ध्यान राखता थका ज़िला कलेक्टर रोहिताष्य सिंह तोमर आज बत्ती बिरखा रा असर वाळा हलकां रो जायज़ो लीनो। श्री तोमर बारिष रे कारण टूटी पुलिया अर सड़कां री बेगी मरम्मत रा हुकम दीना। ज़िला कलेक्टर घणी बिरखा रा असर वाळां लोगां सारू अस्थाई बसेरा री व्यवस्था करण बाबत् ई कह्यो। दूजी कानी आतूणी हलका रा श्रीगंगानगर मांय गर्मी अर उमस बीचे ऊंचो ऊं ऊंचो तापमान 42 दषमलव 8 डिग्री सेल्सियस दर्ज करी ज्यो।

मौसम महकमो आज राज्य रा सगळा संभागां मांय ज़ोरदार बिरखा रा आसार जताया है। बीकानेर अर जोधपुर संभाग मांय काल ऊं 29 जून ताई बारिष मांय बधोतरी सागे कठे-कठे भारी बरसात रा आसार है। राज्य रा ऊगणी हलका मांय आवता एक सप्ताह ताई बिरखा चालती रहवण अर कठे-कठे भारी बारिष व्हेवण री संभावना है।
